

甯河縣志卷之十三

紀載

寶坻縣記

畧叅日下  
舊聞節本

金鹽使司

劉晞顏

神都全有禹貢冀州之域星文箕尾之分虞舜時爲幽州夏商省幽併冀周初復爲幽州召公分土爲燕國秦始皇并天下制三十六郡以幽州土宇爲上谷郡歷漢魏下至隋唐以來或爲燕國或爲廣陽國或爲涿郡或爲范陽郡都國廢置更易不常唐末劉仁恭帥燕爲其子守光所囚據其地僭稱燕因置蘆臺

甯河縣志

卷之十三

記載

一

軍於海口鎮以備滄州後唐莊宗命其大將周德威破燕軍於平岡復收蘆臺軍同光中以趙德鈞鎮其地十餘年間與利除害人共賴之遂因蘆臺鹵地置鹽場又舟行運鹽東去京國一百八十里相其地高阜平濶因置榷鹽院謂之新倉以貯鹽復開渠運漕鹽貿於瀛莫間上下資其利遂致饒衍贍於一方清泰三年晉祖起於并汾以遼主有援立之勞因父事之以山前後燕薊等一十六州遺遼遂改燕京因置新倉鎮廣榷鹽以補用度爾後居民稍聚漸成井肆

遂於武清北部孫村度地之宜分武清漷縣三河之民置香河縣仍以新倉鎮隸焉皇朝奄有天下混一四海天德間建議令盡以遼宋故地合爲一家會甯興王之地朝廷在焉而尤近東偏凡在經畧之內地則遠近不一事則繁簡不同乃詔建都於燕京於時畿內重地新倉鎮頗爲稱首直以權院自趙德鈞初始以來歷遼室迨及本朝二百年間綿綿不絕每歲所出利源源不竭以補國用故也主上中興撥亂反正思補正隆殘弊每以調度究懷以權鹽課利浩大

甯河縣志

卷之十三

紀載

二

其司鹽者嘗以散官雖秩至幾於三品咸以流外當之廼命有司改權鹽院署置使司陞爲五品設副使之官廉從俸秩視諸刺郡以重其事於時居人市易井肆連絡闐闐雜沓翁伯濁質張李之家皆以世業底富加之河渠運漕通於海嶠篙師舟子鼓楫揚帆懋遷有無泛歷海岱青兗之間雖數百千里之遠徼便風亦不浹旬日而可至其捫瑇瑁嘴螭之徒若豫且網龜交甫解佩者比至有不耕穫不蓄畬者其稻梁黍稷蟹魚鰕鮓不可勝食也而河渠左界灤水右

纏潞曲薊北名山無不委曲而貫通之雖斧斤不入山林而材木亦不可勝用也其富商大賈貨置叢繁既遷既引隱隱展展鱗萃鳥集鬻者兼贏求者不匱大率資魚鹽之利其人烟風物富庶與夫衣食之原其易如此而勢均州郡雖古名縣不是過也人情揆之不列縣治殆爲失稱大定十有一載辛卯冬至郊天後鑾輿東巡幸於是邦歷覽之餘顧謂侍臣此新倉鎮人烟繁庶可改爲縣第志之明年有司承命析香河東偏鄉間萬五千家爲縣以權鹽歲入國用方

甯河縣志

卷之十三

紀載

三

之天下及至十一謂鹽乃國之寶取如坻如京之義命之曰寶坻列爲上縣著於版籍是歲春季天官爲除令丞簿以典其事於時坊廓民居千有餘家自餘村間著爲四鄉東曰海濱南曰廣川西曰望都北曰渠陽其坊正里正胥史應兼從人數列同上縣粵有縣令振威將軍王稔來尹是邑縣丞忠武校尉李愿主簿儒林郎李拱昌縣尉昭信校尉孫告中叅豫連判以備其職先是新倉鎮權鹽處其西其東則水濟務有永鹽之號亦別更爲使司與權鹽對峙而角遂

規規然犬牙爲強弱每歲地官第其課績增損以殊殿最朝廷病其乖戾不一因校讐利害得以永鹽所入處之故迨三年癸巳遂省併永鹽於權爲一司歲入課利通計一百三十餘貫仍署爲寶坻鹽使司於時縣治尚百凡草創未有公廨縣僚乃相地之宜於渠水之南大覺招提之西卜爲縣廨招提之東縣丞主簿公署次之又於縣北郭郭之外卜尉廳焉其所經費仍具辭牒聞於地官皆請給之方營建間吏民鼓舞莫不子來人百其勤賈有餘力而樂爲之用不

甯河縣志

卷之十三

紀載

四

一二年間令丞簿公廨皆以卽敘其廳舍廊廡高宏壯麗具有可觀自餘畿內諸廨無出其右者時里中豪右嘗欲礱石以刻其事迭來懇求爲文於予至於義不可辭非欲文其事以紀其實焉

勅建學宮碑記

邑令 沈 濬

事出於因可以無書出於創則不可不書書之見聖賢維世立教具於人心著於學校東西南朔莫不暨訖而依古以來作人之化至我

朝爲備極其隆也甯地面海負山左控雍奴右跨無終

潮河自薊趨海逶迤環繞中有爽塏一曲民繁廛聚  
先爲梁城守禦所洎雍正九年間攝邑督事武進劉  
公請於  
朝析寶坻東南隅若干鄉改爲邑

命名曰甯河隸京兆聿稱左輔濬以十一年夏蒞此邦未  
浹月而水爲田害禾稼不登今 宮保大司馬制府  
銅山李公憫民之艱

奏請發 帑粟援被水諸邑甯與焉民旣安集慮恐未  
周俾次年春以工代賑爰作學宮濬乃度廣袤奠基

甯河縣志

卷之十三

紀載

五

址購良材運堅甃工則倍其傭物則善其賈懼無以  
承

德意用晨夕靡甯底績於成而後已廟在邑之坤位秩然  
中隆者爲

大成殿其北爲

啟聖祠其傍爲 配享從祀諸廡門垣池橋之類舉而

崇深畢備繪藻輝煌廟之西爲明倫堂齋舍庖廩以  
次咸列計爲楹六十有四其高廣構締之式則圖於  
冊以上計府焉自是而奉籩豆有所諸生以時習禮

咸知矜式矣廟既成都人士進而請曰昔魯作泮宮  
春秋不書謂有國之常事耳茲役也既粒我以生復  
牖我以成非大司馬公其孰能奉揚

天子之休命非我侯又孰能闡大司馬公教以兼養容保  
無疆之盛心哉此而不書奚以示後濬惟學以明倫  
爲本尤以正心爲先心正則閉戶而修嚮往皆得古  
聖賢之微意心不正雖日偃於廟徒習其文而於仁  
義道德之實無當也况今日之士卽異日公卿大夫  
志正則風俗因之所謂修身齊家治國平天下端必

甯河縣志

卷之十三

紀載

六

本諸此甯爲 畿內地沐浴教化近且深又值

聖天子以道出治表正萬方其太和之翔洽山海之精英  
積而發於人當必特生賢哲輔翊文明使人心皆復  
於三代之隆是惟

朝廷建邑立學之意使嗣守此土者庶幾拭目以觀成  
焉是工經始於雍正十二年春越九月而落成計費  
銀六千二百五十三兩有奇凡共事者例得述勞動  
以紀始終因從都人士請謹勒石於門左

重修學宮碑記

邑令 謝洪恩 歙縣人

其惟我

國家尊儒重道文教誕敷海宇同風禮陶樂淑自畿輔以及郡縣所在設立膠庠百年於茲矣甯邑爲寶坻析縣自雍正十一年始建學宮以草創之初事由簡約而其時又以水溢害稼當事者方勞於濬築撫綏之務蓋教養之不能並舉也是以率土茨以爲垣軌礫以甃陞裁取成就而已洪恩以乾隆二十二年秋八月恭膺

簡命來宰是邦蒞任之始先展拜於孔子之堂見兩廡胥

甯河縣志

卷之十三

紀載

七

就傾圮心竊感焉夫諸生之所得以時明倫而習禮者賴有學宮而宮之所以納諸生於彝倫禮教者亦必其地之可以集衣冠肅俎豆凡夫車服禮器所謂登其堂想見其爲人者將於是乎在而非可委諸草莽已也洪恩卽首捐俸金百兩進邑之紳士而告之以其故邑紳士蒸然慕義輸金者絡繹綜其成數度可資修葺之用矣乃請於各憲而更舉 宮保制府方公致愼斯役之意以復於諸紳士曰學宮之得以重整也誠賴此邦之賢士大夫相與以有成矣顧將

謂塗飾一時之計耶則且以其事諉之邑宰邑宰不能親理也必假之胥隸以任之則弊叢而工必不固夫事非創始之難踵而勿替之爲難非踵而勿替之難得其人而經理之爲難請與紳士約老成若某謹慎若某請司出納諳練若某敏達若某請司工估靜而才若某請司鳩督寬而鎮若某請司糾察旬爲之要月爲之會以其數報之邑宰邑宰於公餘時來簡核焉於其事之峻則以其數報之上憲如是庶學宮之成垂之可久而邑宰與賢士大夫亦一勞而永逸

矣紳士皆曰善乃擇吉日鳩工庀材掃除之塗蕪茨之牆之累以土者易以花甃陛之甃以礫者易以文石由

大成殿 崇聖祠至兩廡兩門名宦鄉賢橋門泮水渙然一新又於櫺星門東西增建忠義節孝祠二別立碑以紀之更建義路禮門兩坊以肅出入落成乃率紳士釋菜焉因揖廣文而語之曰夫廟貌之修也典禮之舉也是有司之責也若夫士習之醇也文教之明也是師儒之任矣期共勉之哉於是爲文以記而



并書先後捐資襄事諸紳士姓名於碑之陰以傳諸後云

重修 文廟記

教諭 魏 泰 天津舉人

從來風俗之成厥由教化人文之萃端重巖宮甯邑舊爲梁城土籍隸於寶坻自分縣後始建學於邑南城夾於左河拱於前離光耀采大啟文明水勢迴瀾鍾毓靈秀以故科第蟬聯風雲際會雖荒村海曲莫不蒸蒸蔚起焉學宮之有造於甯也大矣哉但歷年經久不無風雨之漂廟貌依然難免丹塗之滅櫺門

甯河縣志

卷之十三

紀載

九

庶瓦半改昔觀每值祀丁之期瞻拜者咸惋惜焉 泰

職在司鐸責難旁貸因請邑公併集紳士捐俸出資計日鳩工頽敝者引之整齊剝落者加以黝堊殿廡輝煌門堂壯麗而且前基逼窄河近宮牆挑土平鋪引至數丈非僅昭地圖之廣濶更可疏氣脉之悠長自茲文運宏開才雋倍勵科名絡繹繼繼承承斯舉之右文興化豈淺鮮歟爰索筆誌之

建忠義節孝祠碑記

謝洪恩 見前

忠義節孝者天地之正氣而生民之懿德也載在祀

典凡以厲風俗美教化治術之隆由此尚焉初甯邑於此兩祠缺而未建洪恩來宰是邑心竊異之意者邑小而無以奇行著者耶抑析邑未久而經制有不及耶聽政之暇爰取案牘而稽之甯邑未分之先其奇行炳著足爲一邑矜式者無論矣自寶坻析治而後垂三十餘年值今

聖天子嘉與斯民獎勵善類 官保制府方公表揚潛德殷殷如不及焉而甯邑一隅有美弗彰典禮未修是邑宰之所不得辭其責者矣乃於重修學宮之日卽

甯河縣志

卷之十三

紀載

十

於櫺星門之東西建二祠修歲祀焉於其落成也爰爲之記

學宮善後碑記

謝洪恩 見前

重建甯邑學宮工旣竣司事諸縉紳會計之經費材木磚瓦黝堊之類若干工匠餼食畚具之類若干尚餘原捐白銀一百五十兩因執冊而納之於公廨之中曰事畢矣謹報命予嘉縉紳之克慎斯役而復慮善後之不易也旣獎譽之復諄勉之曰向不云乎事非創始之難而踵而勿替之爲難

重建學宮碑中語

夫以今

視昔則昔之初建爲創以後視今則今之重建者又爲創矣不有以立其章程定其條目則旋建者亦旋頽耳然則可不爲善後之計乎夫善後無他在乎瞻修治之源使之不窮謹出納之流使之有節而已繼自今三年之內無勞繕葺以所餘之數存邑之各紳權子母而累生焉月什二爲率三年當得二百八十兩有奇又度支年修學宮銀每年十兩亦累計其子三年得四十兩有奇總其數得三百兩有奇至癸未年冬卽得生子七十兩有奇矣以給歲修之費約計

尚可贏什之四五以所贏者仍存各紳而銖積之循環掌之歲終則核歲修之用及所餘而具書之於冊以復於縣官司無所那移胥徒無所侵蝕如是則其源不窮其流有節垂之久遠無難已抑不特此也由是增高而繼長之將使肄業益其居藏書益其所膏火益其資飲射益其儀恒產闢焉義塾興焉洪恩不敏將爲爾縉紳翹足俟之夫亦教養之道所爲相通者也而豈唯是廟貌常新爲崇飾觀瞻之具已哉縉紳皆曰善請嘗試之乃綴數語紀其實以勒諸石用

爲他日之驗云時則乾隆己卯冬十有二月也

新修梁城所城隍廟記

明武狀元陳燮  
副總兵

祀城隍於闔都固以崇報亦惟是四郊內外大而刀兵災沴小而祈禳誓戒所以聳耳目一衆志而壯形勝者也梁城故有廟歲久傾圮鞠爲藜蕪居民就北郭隙地繪像奉香火梁城控制上游天子簡裨將視師不佞實被命往欲謁神而無所召百姓詢之百姓指北郭謂余彼區區者夫非神之所棲托者乎至則斗廟蕭蕭僅容旋馬而苔生榻塵生案余低徊瞻睹

甯河縣志

卷之十三

紀載

七

不忍去云夫梁城左彌神京稱十二雄關神所居僅僅止此何以聳觀而合志也集居民相與謀新神廟父老曰東隅故廟址也就視之軒敞盤旋頗得地利喜曰此真足以棲神矣擇日鳩工捐俸經始里人張廣文造余曰鄙生少長海壖惟是城之有廟土人責也責在鄙生不敢煩里旅敢煩明公遂出囊中貲召工師庀木石爲寢殿三間楹翼以兩廡廡而前爲儀門又前爲大門正殿巋然中處合齋房共三十間楹山門前圍牆數十丈周垣繚遶廣袤可五十八步香

火高阜地一頃槐榆柳樹共二百顆丹堊暖黝糾  
璫錯遠之若摘霞而近之若承霓居民入是廟也煥  
然一新其耳目瞻望聖像而肅然以虔恭易其獷悍  
思若何爲人臣若何爲人子若何爲人弟若何爲端  
人爲義士鄉黨閭旅同心一志病死相恤貧乏相周  
出入守望相助春田有祈物成有賽平居成禮義之  
俗遇難爲知方之民十二重關若增而峻庶不虛張  
君重劔意而不佞心斯愜耳不者徒取報賽已耳北  
郭之廟固在也亦奚取於觀美而鼎新之爲先是工  
甫動而不佞有漆水之行今復奉簡書協鎮津上津  
上去梁城一衣帶水喜神廟之落成嘉張君之美意  
且媿不能多助因勒一言告居人毋令此廟爲虛設  
也張君諱時儒號文齋爲里中巨擘云

渠梁書院記

邑令 關廷牧

國家立學興校以鼓勵多士故自邦畿達于郡邑非  
徒育之以膠庠也又必廣立書院而萃處之士旣得  
其講貫之所故能爭自濯磨以稱上意自宋迄今凡  
所以宏儲才之道而收得人之效者胥由乎此也甯

河距

神京二百餘里爲

天子旬服自

憲皇帝分建以來于今垂五十年則書院固所宜亟講也乃前之人多因陋就簡視爲泛常而罔加之意將所謂藏修游息之道竟置之弗論弗議乎况今

天子方以七旬萬壽特開春秋兩闈廣籲俊之恩敷作人之化惠至渥也吾甯爲 畿輔望邑科名鼎盛士多能文章重儒素苟萃其秀良以講明乎先王之道仿

甯河縣志

卷之十三

紀載

古

鵝湖鹿洞之規而訓迪之安見人文蔚起不較前而增美哉邑之東有文昌祠前臨方塘後瞰潮河文閣矗立于祠之左方厥位爲巽兆文明之象焉爰與都人士謀卽祠之後序離而二之更築東西廂爲講堂爲齋舍祠之旁別啟一門以達往來名曰渠梁書院延碩儒而爲之師諸生以時講習于其中月有課季有考拔其尤者而獎進之規模蓋粗備矣雖然吾于是更有厚望焉夫有其舉之莫敢廢者人爲之也予令于茲五年矣經營規創今始得與都人士共觀厥

成而是歲之游于泮與舉于鄉者適于書院稱最豈  
非一時勝事哉然日久則恐視爲泛常而因陋就簡  
之見復起因循苟且漸卽荒廢未可知也尚其志此  
而勿失乎繼自今登堂肄業之士應思

聖天子久道化成之治互相切劘經明行修以仰承

壽考作人之意于勿替歟而贊襄斯舉者例得並書也并  
勒其姓字于碑陰

重修蘆臺文昌閣碑記

吳肇元 前人

史記載文昌宮在斗魁分有上將次將貴相司祿司

甯河縣志

卷之十三

紀載

圭

命六星是爲萬世文字祖故祀之者自邦國達於鄉

黨所稱 文昌帝君實以隆所自也余自病退累歲

遊三輔壬辰春有事於甯邑之蘆臺鎮其地襟河帶

海密邇 京輶亦畿東一大通會年來搜訪他邑志

知後唐同光間卽有此鎮至今閱千載矣暇嘗行眺

循河東邁見鬱然孤臺屹乎平莽上有高閣俯臨西

灑諦觀楹榜則 帝君之是祠于是攝衣而登瞻拜

之次見其椽題薜積崇觀未整慨然思有以新之遂

訪諸鄉之賢士大夫作修葺計而庠生董君元浩貢

生劉君立誠亦夙有斯願僉謀若一乃召工師度形勢擴前規而廣之並建一亭於庭之左爲歲時登覽資議定卽於戊戌九月鳩工屆十月某日竣事高墉旣鞏修亭翼如廟貌改觀衡宇增勝諸公咸謂余首厥事不可無言以紀然此邦文物甲于畿輔貞珉大手何藉老夫然辭而弗獲用敢書其顛末於碣兼爲迎神送神之辭以歌神功而貽來者且著崇祀之所自云

迎神辭曰仰察三才俯惟萬彙惟文爲極彝常所始

甯河縣志

卷之十三

紀載

六

德協 帝車維神之址良月嘉日集我髦士列俎旣潔流黃載旨維神下鑒雲旒冥止

送神辭曰粵稽周雅孝友維神象應奎壁靈著峩岷天爵是荷休聲上聞眇茲下土敢肆明禋願言則儆前軌式循仰惟肸蠁神庥永臻

重修蘆臺興寶聖母廟記

元平州路  
廉訪使

趙鑄

漁陽東南三百里有蘆臺焉面海背山左踞曠野右跨大河地僻而卑民勤而野男薪女汲聚土而煮之成醯而後已舟車水陸運之於民令貴富賤貧旌倪



大小均食之日獲萬緡以輸公府向者大安末河朔不逞之徒嘯聚山谷後天下革新人獲小康歲次庚寅國朝設十路徵收所選通古今練錢穀明儒術嫻吏事者以補之前學士陳公秀玉爲舉首充燕路長前太學正趙德輝副之明年辟鑄行提領關防鹽使司事于是集場中遺民五七人俾誅茅剪棘拾瓦礫平陷穿屋而居之一日沿水而西見有廟巍然榜曰神母詢諸由來僉曰不知獨一老能道之昔五代時南北各據限以疆界幽燕之地鹽絕者歲餘百姓病

甯河縣志

卷之十三

紀載

七

之忽有姥語人曰此地可煮土成鹽遂教以煮之之法不數日俄失所在居人神之聖母之號實自此始由是公私饒足祈祠下者皆如所請鑄因禱之黎明有告者曰臺南十里皎白如春雪者十數頃其厚寸餘迫而視之則鹽也盡驅土人挾箕筐收之力未竟復化而爲水乃作瑞鹽歌以頌之學士陳公亦留詩廟壁後二載粘合公來長鹽政謁聖母祠仆者起之闕者補之顛者扶之壞者成之天龍置之于左雷師風伯安之於右廟貌一新焉屬鑄書之刻於石丁未

年二月望日也

興寶聖母廟記

元翰林院  
直學士 高 鳴

至元二年大中大夫禮部侍郎倪德政爲中都轉運使提領稅使司答木丁同知使事實坻縣鹽使曹巖臣副之三人共政動無遺慮而又諮議石慶詳經歷王榮諸椽使交修參贊盡祛宿弊人誦其德不輟侯聞之曰方今朝廷清明法度修舉吾屬第行之惟謹何德之有若考其所自神之錫汝不旣大矣乎今聖母遺廟雖存風日隕圯苟能完覆其庶幾矣闔場者

甯河縣志

卷之十三

紀載

六

舊聞其言庀徒葺事不踰歲殿堂門廡煥然一新歲在戊辰副使崔鶚鹽判張仲智李士珍李昭管勾李伯俊劉甫等謀刻石以識本末介詳議張君孝純來請予惟世之人有片能銖效輒自負惟恐人之不我與今侯裕裕之能理財之效著人耳目顧乃溫恭恪遜與人言則歸美朝廷歸德于神之所自可謂賢也矣

復修興寶神祠記

明青州分  
司同知 陳九功

國家長蘆運司設分司二南曰滄州運同領之北曰

青州運判領之滄州分司所轄九場距使司六百餘里而近青州分司所轄十一場起嚴鎮遵海而東直抵山海關距使司千里而遠乃卜越支爲適中之地建公署控馭顧其地僻且險出大沽渡海口涉圍淀水泊前此司官罕有至者政弛而民益以偷作奸軌法無所忌憚今上在宥二十有一載倭虜竊發軍興多事御史姚公條議謂青州分司宜更以運同歲一巡行駐劄以釐弊而興利議入上可之著爲令時余方副運閩中滿考而遷是職蒞任甫逾月乃裹糧東

行遵制也第序逼迤寒由非孔道食宿無所抵舍間關至越支衙門先爲遊擊占據貯火器幾至圯廢居旬日不可留矣明年三月復至蘆臺偶見場西隙地數武欲闢爲行寓便棲止詢之場官則曰此鹽公廟基也余訝其名摩碑而讀之乃元平州路廉訪使趙公鑄所爲記則知神爲聖母非鹽公也聖母始五代時教民煮法俄而化去邦人神之而祠所由肇迄元大德間趙公復加修葺臺南一日瑞鹽如雪若然則事神報本固圖治者所宜先也因僦居民廬而以修

復神祠是務募僧題簿捐俸首倡語在緣簿中商人高廉仙階輩翕然好義共成厥美且又以民廬齷齪褻官體于是衆議捐資建公館焉中爲堂四楹前爲大門爲儀門後爲臥室胥吏有居厨廁有所翼如煥如視越支分司猶唇齒然此非余意也余謂神不可以無依而彼則謂官不可以無舍無亦此心之相感有同然者乎工旣訖爲文以祭于祠是日也雨水驟注鹽浸沒傭衆相率而歸次日霽池水皆凝爲鹽余艤舟將發商輩送之河滸奔告余曰適有異事往時

雨後則無鹽而今之鹽不知何來但各傭已散欲倍其值募市人斂之而不能遠送矣此又比曩者瑞鹽亦畧相似得非神赫厥靈有感而必應者乎余懼始事甚難廢之甚易向非廉訪趙公之記則神祠故基已沒而無考余今修復之故特述其顛末以俟無窮云

重修北大寺碑記

張恕 邑人

北大寺其來久矣永樂年千戶朱公昇捨地庀材營建正德甲戌致仕指揮于公璽等見其損壞遂修補

之又有于圮等增建金剛殿并塑像四爲之前者俱已彰彰勒諸石矣乃閱幾何時而茲石則僵仆斷落於荒煙蔓草中且廟之樑木其蠹瓦甍其溜矣至我朝康熙五十四年邑人杜公恭琦談公有序協力修理殿後禪室而杜公履怡亦專修西邊禪房五間是則爲之後者未始不有善可傳也顧自始建以來上下三百餘歲雖屢經重葺而日久變遷殿後禪室五間漸毀於河患已拆而移爲劉猛將軍殿矣凡廟中椽題之朽折垣墉之傾圮磚甍之破缺赤白之浸漉黹

黹誰其過而問之幸談公有序於乾隆十年不憚糜費復次第修理以還其舊是又今之一大觀也恕等念昔人之功爰是復起殘碑安置故地建亭覆之而於後來修葺諸公亦欲鑄石以並垂不朽奈限於力而未能也茲謹述數語以誌俾後之人讀其文覽其遺跡因以想見其爲人是又恕等之志也夫

重修蘆臺寶塔寺記

董桂林 邑人

蘆臺甯邑一大都會也後唐同光間卽爲重鎮今按其地脉自巽方至寶塔寺與文昌閣會氣之所鍾厚

矣閭另有記惟寺之建已不可考故老謂劉守光宿兵之所後改爲之者也殿前一鐵鑪高丈許重簷鈴鐸若寶塔然上鑄有天啟七年之文蓋卽重建時云其殿之側有碑漫滅不可識碑陰僅存欽依御用監東界七字抑亦重建之先所流傳歟余生也晚恨不能溯其所自而重建之後又復頽廢每一過此輒低徊憑弔不能去乾隆三十八年住持僧來悅就家君謀所以新之者家君謂是一鎮之觀瞻實關地利遂身任之而力不能逮因與諸鄉先生籌畫多方鳩工

甯河縣志

卷之十三

紀載

三

荒度未幾琳宮整飾寶相莊嚴而景象頓改舊觀矣閱數載人文蔚起視昔有加所謂地靈人傑信不誣也然歲序流易興廢無常後之人踵而葺之庶無隳前勞哉是爲記

新開運河記

節本

明大學士

李

賢 鄧人

洪爲我朝奠安海宇康濟蒼生而防邊一事尤加周密其東北一帶控弦之士無慮十數萬人而糧餉之需大抵取給於江淮是以大河諸衛歲運三百六十餘艘直抵薊州爲倉而貯之以便支用往時由直沽

循海道備歷艱險不免疎虞蓋近海多風船至海濱不敢遽行必淹及旬日甚至彌月候風色止息方敢一過或至中流忽遇風濤迅作遂罹漂蕩覆溺之患歲損船不下數十而糧斛動以萬計主漕運者恒以爲憂天順改元一新政令天下臣民莫不忻怵鼓舞興起事功而巡守薊州諸君深慮此患詢及父老熟於地里者云海濱有二沽一名水套一名新開沽相去纔十里可以開河通潮以便運艘以避海難於是具陳其事上命鎮守總兵都督僉事宗勝董其事勝

尋嬰恙復命右叅將都指揮僉事馬榮代之又以監察御史李敏工部主事李尚共蒞其事三人者才識俱優迺同心協謀相度高下起薊州諸衛寶坻等處軍夫萬人撫恤獎勵罔有不至以故衆役感悅爭先効力於是歲三月始事於甲午訖功於丙午人皆驚異以爲成功之速如此必有神明默相其間者遂建天妃宮於新河之左僉謂斯舉便國家之漕運通商旅之貨殖公私之利實非小補迺立石於旁走書京師乞予言以紀其事予嘗考唐神龍中於漁陽開平

遠渠傍海穿漕以避海難當時便之於今不氓諸君是舉端有合於前人之所見矣安得而不書獨是興利難保利尤難後之君子苟慕義者視此刻文庶幾興起繼修之志用保此利於無窮是又廣推立碑之餘意以爲來者勸云

工部地修隄記

節本

大學士 杜立德

余邑東南海濱有工部地者上供蓆葦歲取於茲地最窪羣水滙焉向設隄以障之綿亘數十里糾衆力歲有修邑侯蒞厥事列堰如甃備旱潦可恃無大禱

甯河縣志

卷之十三

紀載

三

自癸巳水汎歲比不登余嘗謂鄉人曰設隄所以衛田有隄不修與不種同隄修不善與無田同之地也室家寄於斯一切取給爲終歲計乃數年來東作方興荷鋤望洋卽間有播種溽暑汎發漉漉爲墟年復一年人宜競奮必成此而後別營鄉之人曰唯唯無何甫議鳩工捐資默默殷實者謾以時數是聽緩急弗前鄉曲孱瘠縱有二三人士具精衛填海苦心究竟於邑自廢卽賢令宰起而問之曰因循如是將衆志之弗齊耶抑逐工按畝或半有匿情未均者耶予



任幾何此爾鄉切身事也鄉之人亦莫不曰唯唯而已喜事有人輸公莫力終以道傍舍視之爲之奈何先大人在日日擊橫溢况曾示余曰邑無長物工部地窪而腴數百家恃茲一綫予有懷焉爾他日其終茸乎知爾力勿若然關情實切等於隔膜弗忍也此余惓惓在心者今春簿書煩劇忽夜夢先大人華裾愉顏以扇指阡畝間河流灣曲宛然覺則以爲雨露方濡縈思殷薦也未浹旬而鄉之人至者且言河壅所狀恍與夢中老父所眎相髣髴憬然憶之因勉輸

甯河縣志

卷之十三

紀載

三

麥糧數百斛銀幾三百兩再鼓親友嚮義者協力以助維時邑侯蕭公諱蕙三尹萬公士奇咸鳩庀是力可保數年無潰嗟嗟天下事何嘗不以人力是先况桑梓之地之最切者乎吾鄉人自今倘思患預防無俾潰決則自濟濟人豈有旣哉余又不敢不深望之曰唯唯是爲記

修甯河縣北門橋東窩渡記

邑令

洪肇楸

儀徵人

環甯皆水也其先爲梁城所治隸寶坻雍正九年改爲縣邑無城郭惟西有橋藉以通陸己未季冬余署

寶篆因公至甯取道橋上竊怪其迂迴蜿蜒而故爲  
周折也詢之甯民則曰此南橋也曩仍有北橋則通  
寶坻豐潤玉田薊州遵化三河通州直抵京城東北  
則通灤州永平爲甯孔道又由橋東去四里許爲東  
窩莊有古渡東則通豐潤灤州昌黎樂亭西則通天  
津河間等處爲甯要津惜也舟梁圯壞人咨病涉者  
不計年矣而此橋僅存故多周折耳予聞而誌焉夫  
邑之有橋梁道路所以惠懷商旅阜通貨賄也商旅  
不至則民財乏民財乏則邑無起色而難與爲善伊

誰之責歟將昔之宰寶者以鞭長而不及繼之宰甯  
者又以新設爲不遑計歟抑其間或有意興舉而又  
慮獨力之難成而民莫吾與歟不然何任其廢墜而  
若有待也未幾予奉

命調署茲土於庚申八月蒞任公餘周覽則果見北橋古  
渡舊址宛然噫嘻是又誰之責耶將猶諉於鞭長之  
莫及而藉口於新設之不遑耶抑未用吾力而先慮  
獨力而難成未謀吾民而卽億吾民之莫與耶不然  
興廢舉墜吾責也而猶可待耶爰捐薄俸爲士民先

於是邑之紳衿士庶及寄籍商賈并寶邑聞風者果  
皆踴躍鼓舞協力捐資辛酉仲春遂採葦庀材鳩工  
度匠迨三月而兩工告成當其將成而予適又奉  
命仍調寶邑矣夫古者功成則誌不忘創造之艱也今橋  
與渡皆前人所創予因而修之爾抑有何功獨念遠  
近父老子弟一唱百和懽然共襄盛舉俾多年廢墜  
並振一時樂義之盛爲不可沒更可異者予軫念于  
署寶以後今竟訖工于調寶以前八月于斯謝茲二  
責豈橋渡有待于予之修而予特來抑予有待于橋  
甯河縣志

卷之十三

紀載

三

渡之成而予始去也數耶非耶夫宇宙興廢何常興  
而必廢者存乎時廢而復興者存乎人倘後之視今  
無異于今之視昔則今之待後更切于昔之待今嗣  
而理之毋俾廢墜將利濟者與川流同其不息矣因  
勒于石告後來繼今者

修潘莊石橋記

邑令

屠祖賚

孝感人

梁城西偏故平行也河何昉北漕滙衆流苦淼雍正  
間 怡賢親王奏得

昔於是淪於是澆澗也置橋何東西人行過是都者漲利

泐洩則泥也橋奚制募匠於津伐石於薊濶十有一尺長八其數而兩之面平如削十七其孔也孰經始前尹鍾請於上報可歲洧飢不承權輿也茲之役誰與董者浮圖無瑕首之劉公臣劉秀儒趙明吾劉開之李顯儒踵之四周人士交翊之葺工程材經理當者孝廉楊鈞邑弟子員李長祚諸人也糜金錢百八十八萬有奇以乾隆十七年十二月丁酉工興既明年四月丙午也周禮司險達阻石漆成備誌巔未令職也

甯河縣志

卷之十三

紀載

三

重修西隄頭金鐘石橋記

甯西南九十里許曰西隄頭者界與津毗蓋車馬衢也先是總河太保高少保劉因三次水利案內相其處設橋飭前津尹張甯尹葉董厥成事在乾隆十一年嗣連蹇沉澹塌淀流漲橋竟圯適余有南倉隄工之役過其地父老張奉祿馬俊張傑李守基張奉相李大才陳九鵬等環馬首請曰昔諸葛武侯治蜀道路橋梁靡不舉君子謹之近奉

恩旨詔天下橋梁應修者地方官勘實動帑興修茲橋之

廢公得毋惻然乎因持募贖上余用是移商津侯懷  
謀所以復之者兩邑紳士義民胥踴躍共輸白鏹五  
百六十餘兩伐石鳩工規制較闢且益固不數月工  
竣成之日問記於余爰識其畧云

蘆臺跨河跳板碑記

邑令謝洪恩見前

古者九月除道十月成梁凡以便行旅使民不病涉  
也詩稱造舟爲梁杜預以爲卽河橋廣雅亦以造舟  
爲浮梁蓋河之廣者不能爲橋則爲梁以濟橋之窮  
而北方地寒河水所謂浮梁又有時而窮者矣甯邑  
蘆臺爲薊之運河所經水濶數十丈設舟以渡至冬  
月則行人率由冰上渡地屬通津人車駢集河長冰  
滑時有顛仆之苦洪恩奉

甯河縣志

卷之十三

紀載

五

命來宰此土於去年冬月周視其地馬之蹙者日三四車  
之覆者日一二焉心甚憫之因思造舟爲梁繁重不  
可以行而索板以載較爲便宜時蘆臺巡檢葛君來  
謁因與熟計之洪恩卽捐橐中俸令葛君董其事周  
河面量之自南岸至北岸廣四十五丈六尺乃構巨  
材準而爲跳板者三十二釘以鐵環絡以麻縹綿亘

河面若浮梁然閱三日而成車馬之馳若康莊行旅之趨若衢路矣今年春月冰泮葛君請撤板而用舟因語之曰是既有成效矣勿可忽也予其計每一板之長短厚薄廣狹而誌之計板如干鐵環如干麻縹如干悉載之爲兩冊一存邑中一與板俱貯蘆臺巡檢所每歲孟冬施之仲春撤之有朽蠹則以聞於縣而註之冊隨時繕補板索之費約需白金十兩於公項支用遇大修之年則酌歲修所餘爲之有不足則邑宰捐資任之不勞民力不費民財公私不得假用

恐轉輾廢置漸以妨民也夫乘輿濟人非爲政之體而水涸成梁固民事之要也將以通其窮於橋梁之外而廣其利於車馬之間所望後之來是邦者採愚者之一得有基勿壞踵而成之則於政體亦不無小補云

允毅橋碑記

劉

濬

邑廩生

營城東口木橋歲久朽圯往來者漸有褻裳之病里人咸告於邵公承富公曰吾思辦此久矣然此橋當水之衝潮汐晝夜出沒激盪易壞非更築高隄易之

以石未能以持久也必得明於地理者審視形勢始可集事於是延堪輿共謀南去故址二百餘步而建石橋於其所經始乾隆三十年之仲春而竣事於夏方鳩工時公慮其爲之未固而數十年後或傾折頽敗也日親至工作之地慰勞勸勉困甚乃去旋卽復來如此者四閱月絕不言其勞瘁詩公蓋年已九十三矣旣成里人重其義求刻石以誌之而囑予爲文并名其橋予曰事之宜爲者人多袖手而不肯爲或爲之矣亦祇出其餘財而未嘗竭己之力以爲之公

甯河縣志

卷之十三

紀載

三

耄年而勤勵若是可謂一介之士能存心於濟物老而毅然不回者矣請名橋曰允毅以著公之篤志焉

重修西城樓外橋梁碑記

舉人方

澄寶坻人

稽古帝王開設疆場則必築城以衛之鑿池以周之復架橋跨塹原爲一方之保障備守禦通往來也甯邑舊爲梁城所自分隸寶坻以來向無城郭緣四面環繞河渠難以修建故前憲等未及

奏請惟是僅有柵欄且傾且圯向存橋梁而日久朽壞乾隆癸未冬邑侯任公恭膺

簡命下車伊始因念茲邑本屬彈丸窮荒已極而顧此橋梁又復廢而不治則地方概難甯謐車輛艱於險行將月令所稱完要塞謹關梁者果何謂哉是亦有官守者之責也爲此仰屋自籌不惜解橐捐俸置木石構工匠命督修遂募士民興事任力值甲戌前四月庚寅工興至五月庚寅凡柵之四易土爲軌橋之四更小爲大匝兩月次第工成計費五百餘金夫設險可以守國成梁修道亦王政之一事也矧邑無城郭恃此環衛尤爲慎固封守之要哉此皆賢侯嘉惠元

甯河縣志

卷之十三

紀載

三

元之至意也語云業不忘於圖始爰勒碑以紀之

建修義渡橋梁道路碑記

吳肇元 見前

甯邑昔爲梁城所隸寶坻雍正九年始分縣爲甯河其時田廬皆草創歷來因之未暇闢治也今

上御極之三十有四年滇南黃公來知甯邑甫下車卽毅然有振興意顧次年卽告水患三載無甯歲侯憫然傷之賑恤不遺力而民獲以安去秋遂大有年家給人足侯乃慨然曰惟甯新治邑若橋梁若道路悉未修治今幸承歲豐比戶慶盈甯矣其乘此以葺治乎



於是捐俸爲倡民翕然從之乃屬紳士等董其事而親爲之周覽指示量時庀材百工咸奮如東甯北甯兩渡昔苦徒涉今爲巨舟矣昔爲板橋者今易石梁矣南沽昔淤陷今立橋以通行旅矣至類宮爲邑中人文所係向殊湫隘茲則於前拓基爲案然後山川扶輿之氣乃益有所鍾毓焉他若道路之窪下者坦平之渡口之薄蝕者培補之大都吾民之所欲爲者不二稔中織悉舉舉蓋侯之惠澤及人其隨事溥利者如此僉謂是不可不立石以紀德政因綴其事以

甯河縣志

卷之十三

紀載

三

誌弗諼焉

永濟橋記

劉灼邑人

漢沽村東口舊有板橋屢修屢缺旋至朽壞行人車馬過此者惴惴焉懼有失墜於是羣謀易之以石而崔翁鶴庚馮翁時亨蕭翁國扶鼓舞其事余亦贊議於旁諸親友之有力者無不樂捐貲以助於乾隆三十五年孟春鳩工創始至夏初而落成其梁高一丈五尺濶如之長則四丈有半制取完固久遠而已無繁飾也構造之日余以事他往崔翁驟得病未起而

蕭翁又以務冗未暇兼理此三月中督視匠工築籬舍日兩餐皆饋食蚤作暮歸不辭况瘁者實惟馮翁一人是任橋既成衆不敢忘其勞也爰命余爲記而名是橋曰永濟云

重修東渡碑記

劉潛邑人

環甯皆河也其西河稍窄舊有橋梁南北東三面水深而廣均以舟渡而東北兩渡尤爲邑來往要津但浪擊冰澌率四五年一重造否則鮮不有風波患焉邑侯徐公自下車以來軫念民艱興利替弊而於津

甯河縣志

卷之十三

紀載

三

梁塗道諸政尤悉心按理甲申歲夏偶見東渡破壞臨淵者胥銜戰惕心獨憫焉廼捐俸金以爲士民倡於是邑中人咸鼓舞樂効至次年春融舟楫告竣而北渡亦以次修補邑人喜涉川之利感侯之德澤也爰鑄諸石以誌不朽

西城樓記

廉芳邑人

甯邑爲梁城故址三面距河其西一面可通往來建樓於茲爲一方之門戶也明季流寇壓境居民懼不免謹闔扉匿避相視駭愕計無所措旣而賊至城下

輒驚竄如有所追逐狀移時劍槩聲寂然開戶覘之  
賊已杳無踪跡矣時倉皇中有遙見樓上光怪奪目  
久之乃沒事定衆驚爲神登樓禮拜仰瞻 關帝掀  
髯端坐從者執刀侍立皆凜凜有生氣乃知盜之遠  
遁以去者果神之力也梁城人戶賴神生全而斯樓  
實爲神所降格之地凡後之生茲土者過斯樓念祖  
若宗得以無恙而今日子子孫孫勿替引之者可忘  
夫所自哉余故以聞諸父老者而敬誌之

海燒記

柯一騰 錢塘人

甯河縣志

卷之十三

紀載

三

乾隆壬戌之冬余驅車寶坻縣時塲功畢登民恬婦  
熙余曰樂哉茲人其人曰亦苦海燒耳余惑焉願畢  
其說曰吾邑東南逼海茲海之下龍宮在焉醜族不  
戒時焚其廬其燒也以辰戌丑未之年春夏之月瀟  
火潛發洪波沸揚焦燎灼楹浮溢海面則百里內外  
人家牆垣門廡器物皆蒸然不可嚮邇矣竟無甯宇  
將鼎其新伐木丁丁徧滿山谷幽靈幻化匪可測識  
秋潦霖霖百泉暴漲則羣譟曰龍發木矣凡入海之  
木皆豎而行夜視其杪有光幽然如燈其不爲龍取

者則依流漂蕩不入於海是歲以潦民則苦矣余聞而感滋甚既而館於王司馬舜輔家王君家寶坻幾四百年其爲人喜文章藏書萬餘卷攷究極博余以是質之曰事誠有然然言不雅馴志乘無稽焉惟杜光庭錄異記載海龍王宅在薊州東吾邑固薊治也余曰然然則水中有火亦可類舉按集異記晉穆帝昇平三年二月涼州城東池中有火四年四月姑臧水中又有火劉勰新論載蕭邱寒燄蕭邱者在海中有自生火春起秋滅著木不焚其能焚木者則九國

志所載之楊林江水博物志所載之蜀都火井蓬溪縣志所記之火泉海燒者亦此類也夫龍爲靈物豈不能自庇其字旣卽於危亦思所變計東海廣袤半於天地浩瀚無垠之中何地不可長子孫者而溷溷於此至漂禾殺稼困我民人抑又甚焉此豈所稱靈物哉蓋荒忽幻誕之事存而不論此志乘之所以無稽者也夫寶邑地窪衆流所聚又洶河旣湮羣沽間塞蓄洩無方旱則焦壞潦則巨浸不在苦海燒也今國家沛浩蕩之澤興舉水利地方良有司方廣諏博諮

以襄巨績大利既興故患畢去此邦之人其永無苦矣王君曰善是可以記吾將登之貞珉以規治本

鐵神記

崔正音 邑人

甯之瀕海處有鐵像體制儼如王者傳爲浮海而來土人神之妥以數椽奉以香火前推使徐公亦傳以金初不知其卽爲鐵之神也亦不知其別有神而以鐵像之也噫嘻古來之不可知者多矣而况鐵神乎哉昔管子伐孤竹繳山海以富齊其鐵制杳不可考迄漢武復秦塞大農鹽鐵丞議縣置小鐵官鑄器給

甯河縣志

卷之十三

紀載

七

民以充邊費夫欲籠天下之利於鹽鐵斯鑄爲像以神之亦事之未可知者而土人則以爲自海浮來也何居慨自歷代之紛更也視邊海爲利藪怒則奮爭和復割送其人民逃竄走死子孫且不知祖宗之居址而又安知乎重而難遷之鐵神創留於何氏哉或曰鐵鑄爲像而人神之非鐵果有神也余曰不然凡物之適用於人而利及後世者則其功皆可祀况鐵之山靈盤結取精用宏自軍國農鹽器具以及委瑣屑缺之屬靡不取資焉則其利大且久矣且利之出

於山者統於山出於水者統於水山川之神固與社稷並崇祀典矣而顧曰鐵神非神乎哉或曰惟神則靈靈則顯鐵利農鹽諸用而獲利者第稱其所獲以報之而鐵不居功則卽謂爲不神也亦宜噫嘻神也非厲也使鐵而爲厲而或剛化爲柔豎易爲脆利變爲鈍戾造物之仁奸上帝之命以厲農鹽者厲天下則且不可以爲鐵而何以爲神神也者固順物之性以美利利天下無在而無不在者也固真真漠漠亘古如一利民用而不自知其利者也夫非鐵之爲神

甯河縣志

卷之十三

紀載

三

自有神乎鐵者古人不傳也土人不知也神亦不言也吾得而記之曰不可知之謂神

銀魚說

明邑令

胡與之

餘姚人

浙之富春山生茶茶味不下六安陽羨富春江生魚魚味比龍江似勝記所謂四海九州之美味也國朝每歲之春採以進貢正德間必內臣採取居民不安浙之府縣並望風萎靡矣獨臬僉韓公邦奇奮然憤焉欲奏除此害乃作歌曰富陽之魚富陽之茶魚肥賣我子茶香破我家聞諸朝其時武廟以爲訕上欲

中以奇禍後幸而獲免亦自分永棄矣及嘉靖初朝廷聞忠直起官位至卿孤天下咸賀聖天子之能起廢旌忠公之直道不容於前而克伸於後也士君子各抱正氣以行愷悌愛民之德而公之令名亦無窮矣余爲寶坻凡六月余視寶坻銀魚實有類於富春之茶魚而居民之不安殆有甚焉者矣余弗能爲韓公之所爲要亦服韓公之義也於是乎書

杜太傅詩選序

編修

劉正宗

北海人

昔人以立言爲不朽事今杜子方珥筆梧掖爲當世

甯河縣志

卷之十三

紀載

三

建白崇閎光簡冊其眎韻語固不啻雕蟲耳然常觀之於風矣當其蕩乎無垠鼓吹萬有刁調滿天地頓令絲磬匿音革金失響然方其起於蘋末拂於几席則雖一葉之鳴一塵之動皆足感陰陽而領涼燠是風之體有微彰不同而其爲大塊噫氣則一也乃風人之旨奚獨不然且所謂小道壯夫不爲者第流連光景如池草燕泥之章而三百篇中雅頌並陳薦之朝廟至於忠臣孝子勞人思婦之所謳吟并能羽翼世教陶淑性情是豈但賢於博奕者之爲乎余於杜

子建白時卽知其能詩頃以于役浙闡方舟南下益  
得商訂具酬答見其時而誼重嚶鳴則停雲諸什不  
足喻其篤摯也時而憂深民事則絲穀諸謠不足寫  
其懇惻也時而登臨嘯咏攬物興思發抒懷抱則楊  
柳梧桐之句不足肖其光霽摹其冲夷也華而不靡  
廉而不劇跌宕而不佻激玉潤珠明規圓矩折杜子  
之詩其杜子之人而是乎常讀君家少陵北征篇矣  
子瞻謂忠義之氣與秋日爭高山谷亦謂其表裏風  
雅卽退之之南山可以弗作而此詩不可廢通乎此

詩之道思過半矣可以讀杜子之詩矣則欲觀杜子  
之言者請卽自其詩始

問奇集小引

杜立德

言有近而多忽習焉而不解者偶于無意中爲有識  
者所指未免介然起念學者每每如之所以古人辨  
微析旨及一字一畫間動有深義非曰好爲是拘拘  
也爲其廣所蘊也其蘊厚其詞美示諸鄉國可以洗  
訛亦可以正俗上下古今耳目流覽之際何必提鉛  
懷槩矢口卽是矣不然絳虹莫辨讀蹲鴟而以羊認



者豈好爲是遺譏乎哉斯集也原張洪陽所著先大父自南雍攜來爲顯吾李表伯所珍後仍證之家君雖近而易知之書間稍增續爲小笥要指輯先帙也亦展洪陽居士餘意弗敢忘所自云

獨樹齋詩序

寶坻進士王 墀

余教讀渠塘數載門下士惟高子叙五最少其資秉亦最優聰穎好學日記數千言未冠遊津門經甯邑之聚糧城作鐵泉記足補簡冊之闕而其文清腴秀峭胎息入古尤徵天授焉平居喜讀先儒語錄常以

古賢哲自期自沖年弱不勝衣親且老甚鍾愛之其奉侍愈敬謹不自安家素封族人多矜情華撫而叙五寄處蕭齋琴書爲伴一觴一詠儵然自得視身外之富貴漠如也其於義利之關邪正之界持之最嚴及接人時則詞氣和易未嘗有所忤以故宗族交遊咸重其器量焉其爲學經史子集極意窮探獨不喜帖括之文而耽於詩嘗與族弟春航相唱和爲詩超然妙悟不事追琢駿駿乎假天籟爲宮商然余每深抑之以其有防舉業耳未幾余蒞官山右千里睽違

時觸歸與之念歲壬申忽得其堂兄元甫書知叙五  
已赴召玉樓爲之獻歎者累日身後遺篇零落存獨  
樹齋一卷求序於余夫以叙五之爲人使天假以年  
豈僅區區以是傳耶今僅託是以傳正不能不愧惜  
而珍護之蓋以人存詩卽以詩存人耳昔李長吉覓  
句母氏歎其嘔心今人吳天章不工時藝惟好吟詩  
漁洋有仙才之目揆之叙五殆其人歟因念解館之  
後歲月幾何而叙五與其尊翁耀堂公相繼殂謝以  
視脫驂之感自牖之歎爲何如耶叙五名天秩卒年

甯河縣志

卷之十三

紀載

聖

二十又一有子靜甫二齡泉州步玉玉墀序於潞安  
長治縣署

重建甯河縣學宮謝公德教碑 劉毓珍 邑人

乾隆戊寅秋八月江南古歙謝公諱洪恩字萊玉號  
沐堂奉

命來宰甯邑至則勤撫字省催科通溝洫借籽糧平米價  
以足食造浮梁以濟人徒步禱雨雨立應懸金捕蝗  
蝗悉除教養兼修善政具舉不矜明察而獄訟息不  
事搏擊而豪暴馴維時四封之內熙熙愉愉充盈蕃

殖矣又念彝倫爲教民之原宮牆爲造士之地當康  
阜之日鼓舞而振興之甯邑學宮自草創以來毀而  
不修者歷有年所矣公於下車之始卽思改建焉乃  
於今年仲春上丁舉祭禮畢捐吉金爲邦人士倡邦  
人俱欣欣慕義共襄厥功公乃詳請於上憲擇日庀  
材爰命紳士等分董其任或司物料或司銀錢或鳩  
督之或巡視之一一不以胥吏參其間公之立法備  
詳而計慮深遠矣士等敢不竭力盡心以從事於是  
棟楹樑桷板檻之膚墨者新之撓折者易之蓋瓦級

甯河縣志

卷之十三

紀載

聖

磚之破缺者更置增益之赤白之漫漶不鮮者塈畫  
之殿廡門室次第興作卽經始其事又命於隙地建  
忠義節孝兩祠以彰潛德勵風俗焉而後規制始大  
備落成之日公乃率邑之紳士釋菜於先聖先賢  
之前覩夫棟宇輝煌宮牆崇峻翬飛鳥革氣象一新  
顧而樂之進諸紳士而獎譽之乃復勉以向學之宜  
勤操行之宜慎也於是諸紳士咸進而稱曰

國家文治昌明百有餘年沐浴膏澤涵濡德化薄海以內  
郡縣所治咸建有學罔或廢缺而甯邑近屬畿輔風

聲所被當先諸邑徒以考卜未久規模粗立學宮卑  
隘傾圮修整闕焉又土城地窪蝗澇宜備宰斯邑者  
簿書期會差籍紛紜率有志而未逮今我公之來蒞  
是邦也旣撫綏之又躬訓之修舉廢墜惟公倡之敦  
勵學行惟公示之生之成之教之誨之敢不敬承副  
公之意公復詔之曰民生之厚

聖皇之賜也士習之端文教之隆也政務之勤司牧之責  
也學業之粹髦士之功也甯雖小邑可不砥礪而敦  
勉之蓋公之愷悌慈良諄諄不倦也如是是日也張

甯河縣志

卷之十三

紀載

四

樂置飲極歡且洽邦人稱盛事焉公旣勒石以記之  
而邑之紳士感公之德沐公之教不能已於言也因  
復誌其顛末云

道光丙申重修文廟碑記

邑令

周震青

庠序學校之建三代之所以明倫也漢唐以後釋奠  
釋菜之典益隆且備矣

國朝文治昌明尊師重傅光天之下至於海隅出日之  
鄉莫不建立學校肅將祀典是以莘莘俎豆下舞上  
歌士彬彬雅而多棫樸之才民康樂而效尊親之戴學

道則愛人而易使經正則邪熄而民興矧甯河密邇  
邦圻人物蕃阜旣庶且富教莫先焉學宮在邑之西  
南坤方肇建於雍正十有二年乾隆二十四年邑令  
謝公詳請重修迄今七十餘年矣地邇河濱風烈而  
土多斥鹵兼以雨潦頻仍垣墉傾圯榱桷摧頽丹雘  
金碧之色黯淡剝落僅有存者震青於道光癸巳歲  
奉檄來宰斯土旣下車肅衣冠而晉謁目擊景象心  
悚焉不敢康邑儒學陳君來德高君繼第亦同余惕  
惕也因共相籌曰修廢舉墜之役非異人任亟謀所

以完繕之維時歲序不登始籌賑恤之方旋有緩徵  
之請用一緩二民力固未可用也翼歲以公事延見  
邑紳士孝廉廉君如鈺因議重修文廟之役孝廉深  
韙予言願約邵君雙和爲助乙未三月諸紳士咸集  
公解急公赴義靡不踴躍樂輸者予協文武諸君首  
先捐廉以爲之倡廉邵諸君次第各書捐數復分路  
勸勉統計共得朱提六千三百九十餘兩廼乘暇儲  
庀料物於丙申二月擇吉興工大成殿舊基平塌培  
築堅厚眎舊基升高二尺泮橋舊有一座今又增二

爲三崇宏巍煥大啟文明之象焉明倫堂以次均各  
重建復設垣牆映壁並立土地祠於大門之右循舊  
制也其他廊廡覺舍靡弗一一鼎新之凡七閱月而  
葺事若監修紳士自備資斧而始終奮勉不辭况瘁  
者其勤勞固均不可沒也爰首冠於諸紳士實輸銀  
數之上刊勒碑後而重修始末之概特詳記之刊諸  
石以垂永久云

重修文廟碑記

光緒丁丑

邑令

丁符九

江西人

嘗考學校之建歷代相沿皆所以興教化而明人倫

甯河縣志

卷之十三

紀載

吳

也自漢唐以來天下州縣皆立學置學官而釋奠釋  
菜之典遂愈久而愈隆焉

國朝崇儒重道教澤宏深摩義漸仁栽培篤厚自畿輔  
以至郡縣莫不設立學宮肅將祀典以故執事有恪  
俎豆維馨祀事孔明鼓鐘合奏彬彬者禮陶而樂淑  
藹藹者春誦而夏絃文治光昌於斯爲盛矣况甯邑  
地居左輔風聲所被尤先諸邑且靈鍾滄海金波增  
日月之光秀毓潮河銀練壯風雲之色而浩瀚清淑  
之氣釀爲人文發育之祥學宮在邑之坤方義取元

亨之吉肇建於雍正十二年重修於乾隆二十四年  
繼復重修於道光十六年迄今四十餘年矣地邇河  
濱土多斥鹵加之久經風雨剝蝕而垣墉傾圮樑楹  
欹斜實覺難壯觀瞻符九於光緒三年三月恭膺

簡命來宰斯邑肅衣冠而晉謁睹廟貌之摧殘此心實惕  
惕焉幸前任吳令先得我心於光緒二年仲冬業與  
教諭董君訓導韓君孝廉劉震東等商議重修諸君  
素有是志欣然樂從吳令卽首先捐銀百兩以爲之  
倡諸君亦次第輸捐並各鄉紳民共相勸勉而好義

甯河縣志

卷之十三

紀載

七

者奮興鼓舞無不踴躍樂輸三月餘得朱提三千有  
奇及至興工之日正吳令交卸之時余卽任爲專責  
夙夜不敢康於是再加勸諭倍致經營續得朱提一  
千餘合前數四千數百兩余復捐銀二百兩以百兩  
備每年祀典之費以百兩爲廟外修壩之費開工後  
稍值公餘卽往查勘親爲指畫而紳民觀感有由趨  
事之精神於以彌振焉董事諸君自備資斧共襄盛  
事數月之久毫無倦心是此役之興賴此邦之賢士  
大夫相與有成矣大成殿東西廡與前後各祠戟門

映壁及明倫堂視舊基俱升高尺五櫺星各門泮池  
與週圍宮牆亦升高尺五齋房學舍等靡弗一一鼎  
新八閎月而工竣由是丹雘煥彩金碧交輝巍峻崇  
宏大啟文明之象邑之東南魁星樓亦徹底重修升  
高六尺添設羣石更覺煥然一新文昌宮書院並四  
門城樓南河壩或重修或培補一一整齊落成之後  
爲文以記並詳之上憲諸君及捐戶姓名銀兩悉勒  
之碑以垂永久焉

重修橋渡埕道記

邑令 關廷牧 廣東人

甯河縣志

卷之十三

紀載

吳

甯邑袤延百里境多水以河爲城城內千餘戶河流  
三面旋繞獨缺其西地形卑溼沮洳自東窩渡穿城  
迤邐至西關有埕道以通車馬爲赴京往津之通衢  
西關以南則爲甯蘆往來要路居民資河水灌溉田  
園以故橋梁爲多本縣自蒞斯邑今八載矣事之利  
弊民之好惡無時不切諸懷往歲里保告予曰東渡  
北渡舟皆罅漏不可用東西埕道亦壞西關兩橋將  
圯予聞之忽忽若有所失念茲數事倘廢墜不修非  
惟四方賓旅之至止者歎行路之難也卽甯之人亦



奚便焉維時予欲鳩役徒具衣衲持畚揭次第繕定  
庶幾遐邇人民其無返駕無病涉履道坦坦也乎乃  
水潦既降五穀不登予亦知斯時之不易成也顧兩  
渡兩橋兩埕道爲甯邑急務俟之來歲又未知豐歉  
若何時不可失事不可緩是所望於士民之好義者  
共襄盛舉黽勉爲之

于家堡雙忠祠碑記

直隸  
總督 恒 福 旗人

雙忠祠者大興史公榮椿宛平龍公汝元專祠也天  
津控制重洋拱衛畿輔古今險要之地咸豐八年秋

甯河縣志

卷之十三 紀載

吳

皇上命科爾沁親王僧統重兵駐紮津沽督辦防務二公

隨大帥夙夜贊襄殫竭心力勤勤懇懇蓋年餘如一

日焉本年五月十七日英夷兵船抵大沽口外先是

星使在上海與之約兵船不得過雞心灘內至海口

時復屢與照會令其由北塘登陸該夷恃其驕悍拔

我鐵樁毀我防具二十五日兵船十餘隻連檣而進

大帥以全局攸關不欲自我起釁命二公撫綏士卒

隱忍以待詎該夷遽樹紅旗勢洶洶直闖河口史公

在南岸中礮臺駐守龍公在北岸前礮臺駐守奮勇

先登親燃巨礮擊中夷船英夷兇焰正熾礮火橫飛  
二公酣戰多時有請回帳少息者輒大聲叱之是時  
天色慘澹波濤洶湧風雷激盪之中二公遂先後中  
礮亡龍公被禍尤烈史公畧延片刻度勢難支猶復  
指揮三軍大呼殺賊合營悲憤之餘勇氣百倍擊沉  
夷船多隻浮尸海面大快人心該夷皆鼠竄而去此  
固

皇上天威遠震大帥訓練有方亦深賴二公忠勇有以禱  
夷人之魄嚴門戶之防也後有船自口外來者據聞

甯河縣志

卷之十三

紀載

五

夷人云是夕見礮臺兩岸火光燭天靈旗往來如百  
萬軍聲與潮聲相應答羣夷膽落神慄不敢復犯乃  
知二公之靈爽隱爲呵護精忠之氣雖死猶生古人  
云公侯腹心公侯干城二公何多讓焉奏

聞後

九重悼惜命立專祠天津道孫君實司其事擇地于家堡  
鳩工庀材逾月落成顏以雙忠祠肖像於內而以同  
時陣亡弁兵從祀左右慰忠魂從民望也二公奮起  
行間夙諳韜畧咸豐三年粵匪北竄連鎮高唐一帶

流毒滋熾大帥奉

命出師掃蕩羣醜元兇授首北路全境肅清其時掃穴擒渠追奔逐北二公之力居多史公前署徐州鎮總兵擢直隸提督龍公由京營叅將洊升大沽協副將人見二公循循儒雅臨敵從容方將以桂石期之不意鞠躬盡瘁志決身殲不克盡其用如此大帥每臨河干憶二公之忠勤淚潄潄下而三軍之士亦莫不悵鬱唏噓余於本年三月奉

命總制畿輔接見二公已心識之乃天喪斯人不得共事

甯河縣志

卷之十三

紀載

至

一方收指臂之助是予之不幸也而又不獨予之不幸也夫二公之忠炳若日星昭於河嶽原無待予之表揚特誌梗概於此者亦以據事直書無取粉飾俾後之覽者知二公忠義之實云爾是爲記

重修龍王廟觀音殿碑文

邑令

張

昭

貴州人

龍之爲靈昭昭也見田躡淵變化協陰陽之妙出雲降雨呼吸參闔闢之精顧龍雖靈而其所以靈者龍之神爲之也自其靈應而言之則曰神自其尊顯而言之則曰王龍王族類之所處於海則有水晶宮龍

王精神之所依於陸則有龍王廟杜光庭錄異記曰  
海龍王宅在薊州東甯邑固薊治也則龍王廟可作  
龍王宅觀矣梁城龍王廟之設不知昉自何時乙卯  
春予奉

命來宰是邑下車展拜於其庭見其棟宇已就傾頽牆垣  
可通車馬神像亦多損壞不能無動於心焉乃是廟  
向無香火其僧人往往資募他方以爲香火費若第  
培補其大概不使其香烟有所資歲修有所藉是但  
可爲目前計而未謀諸久遠也因廣爲募化得百餘

甯河縣志

卷之十三

紀載

五

金是廟後殿向供奉觀音銅佛其殿宇神像俱就凋  
零遂將是廟工程託王少尉彤華督修竭數月之力  
而廟貌煥然一新共費東錢一千五百串予先期捐  
東錢六百串交當生息每歲得息錢七十二千餘  
由當商具呈交署該廟僧人具呈請領以作是廟香  
火倘有傾圮卽以是項作歲修費由戶工兩房經理  
其事不準於中取利如日後領不足數準僧人稟追  
是役也王少尉督其功諸君子成其美予不過總其  
成而已功竣爰纒序顛末於石云

重修渠梁書院記

邑令 吳夢曾 皖江人

蓋聞經術宜明東漢重鱣堂之化學修共勵南唐復鹿洞之規惟獎拔乎真材乃培成以善俗甯邑地依京輔海湧文瀾涵濡

聖澤之覃庾經日拜蒼萃羣英之盛甲第雲蒸黃閣烏臺績傳名宦緇帷絳帳代有著儒覽志乘以常垂知聲華之由著曩建渠梁書院原爲砥礪廉隅樂羣敬業顧歲時既久不無風雨之侵滲漏殊多幾至牆垣之塌本縣適臨斯邑夙慕名區欲復成規亟應修葺祇

甯河縣志

卷之十三 紀載

三

以添資匪易集腋方成願協力以捐金俾成材而琢玉敢辭創首僅分五斗之糴尚賴同心原廣萬間之厦用是鳩工既就豹變欣占騰奎壁之星精集衣冠而月課藹然儒雅揮毫試班馬文章蔚矣

國華聯袂作蓬瀛學士人文代煥有厚期焉

重修渠梁書院記

舉人 李誠蔚 邑人

渠梁文人之藪也書院在縣治東文昌祠後初建自邑侯關公廷牧經費無多因勸勸六商人吳公肇元每歲捐金以助膏火延師主講育秀儲材至邑侯王

公朝渠親課生徒獎善而教不能一時人文蔚起科名鼎盛老師宿儒皆可以教後世嗣吳商落業無人更襄義舉遂使數十年來文運就衰歷任王公蘭桂朱公以升喬公邦哲吳公夢曾皆捐廉興教實意栽培然旋舉旋輟迄無成章同治戊辰邑侯呂公嘉端攝篆慨然有興復之志因以前任李公賡雲所勸捐賑濟銀三千五百金稟請上憲統歸書院功未竣而卒任所後邑侯彭公瑞麒踵成之發商以權子母又勸長蘆總商何公歲捐百金以爲常酌定膏火及山

甯河縣志

卷之十三

紀載

五

長束修薪水量入爲出雖經廢弛有年而因事就功規模畧備矣行見蜚聲藝苑中田之髦士風蒸聯袂蓬壺

朝廷之杞梓雲蔚於以仰承

聖天子作人之雅化而贊襄斯舉者例得附驥以傳後之君子崇起隆規廣培土類是則所厚望也夫

創修渠梁南河壩序

前人

蓋自畿東作鎮號天輔之津梁邑宰分符指河渠爲襟帶流分瀛海而北勢周學宮以南繡壤紛披收灌

漑滋培之利銀濤乍瀉成淪漣綺麗之形時則波濤  
夜驚潮頭疾作北岸實當其衝西風又助之烈水潦  
盛昌岸善崩而泥沙走淋零交作土盡解而形勢摧  
遂使縱目南樓咫尺而下臨無地迴車北道馳驅而  
方軌難容望洋興歎云如之何邑侯彭公瑞麒思欲  
殺其源流恐難勝其繁費爰與紳耆劉震東等商酌  
事宜謂兵書王著華老成諳練俾協力經營爾乃仰  
承鈞命俯順輿情省無名之費成莫殫之功維時鳩  
工庀材緣木築土南北則綿亘百餘弓東西則周迴  
數十丈兩壩成犄角之形儼作中流砥柱一方奠磐  
石之固那知人世滄桑要之河慶安瀾道稱如砥思  
艱圖易咸推邑有人焉繼長增高尚俟後之作者庶  
幾因事以就功常令有基而勿壞云爾

重修北石橋文

山西潞城  
縣知縣 廉永年 邑人

甯邑一澤國也河水洋洋三面旋繞而西則平行昔  
人於城西浚大壑以通南北之水由是有二橋始建  
年月不可考顧南橋圯於乾隆辛巳壬午連遭水潦  
當時不能卽修歲至丁亥邑宰薛公精堪輿鳩工填

之以故南橋去而北橋獨存顧北橋之存亦幾壞矣  
歲歲補苴以當風濤之衝激非所謂長久之計也已  
西春合邑捐資不惜重費爰易木爲石閱兩月告竣  
非敢謂今盛於昔也亦期一勞永逸俾往來者如履  
康莊亦以繼前功於勿墜云爾是爲記

光緒戊寅續修魁星樓記

貢生 廉 林 邑人

史記載司祿司命諸星皆在斗魁分斗魁者固萬世  
文字之祖所謂文魁星君者也甯邑舊爲梁城土籍  
隸於寶坻自分縣後始建樓於邑之震地城拱於前  
甯河縣志 卷之十三 紀載 五

河擁於後鍾靈毓秀大啟文明以故積學能文之士  
時時間作或增輝於廊廟或馳譽於鄉鄰雖荒村海  
曲亦莫不科名鼎盛彬彬有文學風焉魁樓之有造  
於甯也大矣哉無如歲月已久風雨摧殘形勢雖存  
丹塗滅滅每逢朔望瞻拜者咸惋惜焉光緒丁丑公  
議續修文廟林等因並請邑侯轉詳上憲次年春擇  
吉鳩工從新興築而且前基逼小又引而高大之非  
僅昭規模之壯盛更可疏氣脉之悠長也樓之北爲  
文昌祠頽敝者亦俾之整齊剝落者亦加以黝堊自



茲文運宏開人才倍勵杏林桂苑科第聯綿斯舉之  
右文興化豈淺鮮哉爰索筆記之

普濟橋碑記

屏生

劉文蔚

邑人

按橋在蘆臺南街西有小河自潮河分派南至  
白莊等處以瀉海潮港水之要渠橋以石築橫  
亘其上實津郡之通區尤蘆臺之關鍵橋五空  
長六丈寬一丈日久年湮土塞其旁之二空愚  
民遂占地起屋壅水橫流田園受害同治元年  
邑侯毛公見橋圯河塞諭令邑紳董清佑倡首

甯河縣志

卷之十三

紀載

七

勸捐修橋濬河拆去房屋永不準填塞功成爰  
建碑以記之

蓋聞欲挽河流惟憑砥柱欲通車轍尤藉輿梁不有  
始建往來未便過征不有重修傾圯依然病涉蘆臺  
西街有大橋焉以石代木建於乾隆癸亥改舊更新  
修於嘉慶丁丑自時厥後征騎始得通行亦越於今  
彩虹又形殘缺闔鎮紳耆因思修葺用新雁齒不憚  
鳩工當路之鼉梁起處舊貫堪仍沿河之鱗舍除時  
遺基得復沙隄廣拓無礙停橈石磴高懸有資汲水

從此東連山海皇華之驛路能通西接津門齟使之  
行旌可度柳岸值斜陽之候人遊旣喜憑欄杏花當  
春雨之天車度不愁濡軌此固賴仁人之樂助化險  
阻爲康莊抑尤望君子之奮興遇剝殘而補葺則受  
書圮上與墮屨之地而同傳立柱橋邊並乘馬之風  
而俱遠矣是爲記

重修蘆臺北義渡序

前人

蘆運河源出遷安舊志紀之甚詳入甯河境經江窪  
口環縣治而周之復南凡九曲以達於蘆又南幾曲

甯河縣志

卷之十三

紀載

五

始入海水勢廻環凡通衢皆有渡而蘆臺其最要者  
也不但糧艘聚泊商販往來自道光二十年春奉

旨設立通永鎮駐節蘆臺以防海口轄制十七營各處弁  
兵隨時赴轅者多經此渡又况制府巡閱必經之處  
渡之設也不綦要哉然所需船隻實本鎮及四方仁  
人君子捐資以成舊制公議渡船三支今仍其舊奉  
官府通商旅並有小船絡繹接濟行人三時備用庶  
無叩否之歎昔邑侯謝公利濟爲懷於冰合時設跳  
板以濟病涉近來善士接踵捐設此板一如其制橫

置河間行人利涉上設燈籠高置兩岸夜渡者更不至迷津斯則濟衆苦心亦甚望好行其德者代不乏人爲幸耳亟書以爲好善者勸

重修蘆臺魁星樓記

前人

蘆臺多古刹而魁星樓實居其一負乾向巽棟宇巍峩有屹然特立之觀蓋以文星照耀昭回於天將欲安神靈自宜隆廟貌斯樓之建所由來也然創修伊始代遠年湮雖隨時補葺率多因陋就簡之爲况乎風雨摧其外狐兔穴其中棟折榱崩破缺尤甚向所

謂屹然特立者今則頽然漸圯矣歲庚午闔鎮紳耆於歲首修饗祀禮瞻仰斯樓形勢急思有以新之庶靈爽有憑昌明文運於是或勸捐於本鎮或募助於四方集腋成裘眾擎易舉諏吉興工用葺厥事規模則增之使高基址則擴之使廣周之以垣牆飾之以金碧又以隙地添葺靜室三楹爲廟祝棲息之所經營兩閱月告成此固諸君子不辭勞瘁之所致抑亦仰荷神庥有以默相其成也旣記其顛末如此爰頌神之德而爲之歌曰輝騰珠斗兮采煥瑤樞貫元精

於列宿兮輝魁柄於中區誠斯文之福曜兮宜廟享於方隅惟神之默爲啟佑兮俾人文丕振於吾蘆

蘆臺重修文昌閣序

咸豐辛酉解元李敬亭 邑人

蘆臺東南文昌閣屹然高蔚然秀創建之年廟碑無考重修於乾隆戊戌歲則大興吳公肇元勒石紀事云已擴前規而廣之矣嗣是以來仰荷神庥人文蔚起歲時肸鬻多士拜手於堂退而稍息廡下濟濟焉幾不能容膝於是知人文日盛而廟基仍狹也况百餘年來風銷雨蝕雖間興補葺而木朽石腐頽圯之

甯河縣志

卷之十三

紀載

六

形日甚一日此則有待重修再擴前規而廣之之勢迫於今日者然也本鎮董君清佑毅然捐資倡首協同志諸仁人經畫款費度量尺寸庀材鳩工興事於壬申四月吉日未幾而廟貌告成屹然高者益高蔚然秀者益秀而宏敞則倍之凡以妥帝靈肅瞻拜也向有堪輿謂閣與魁樓相望茲鎮科甲當鼎盛其言豈不信然 國家文教昌明蘆隸左輔被化尤深多士春誦夏絃爭相鼓舞英髦彙進蔚爲國華自有捷如桴鼓者又何待望氣者之以冥冥決事哉

至於廟基之高下橫徑尺丈與亭堂坊橋惜字爐等之規制則宜勒之貞珉以示久遠謹序

蘆臺新建巡司衙署碑記

汪桂

浙江人

前因渡口街係巡司所轄之地而商民因官地築室不下數十餘家歷任每門面一間納銀一錢有買賣易主者持引契到署用印相沿已久道光年間有令民折房遷徙之示闔鎮紳商不忍坐視醵金建立衙署一處以期久遠而每門面納銀一錢仍舊焉蘆臺隸甯邑例設巡檢司一員其地爲渠梁奧區襟河帶

甯河縣志

卷之十三

紀載

空

海風物之饒甲於通邑而官署闕如向之蒞斯土者率就民房居之余於道光己亥冬調任斯鎮苦其居之遷徙無定乃毅然爲建署之議但自購買以及改造修整之費需用綦繁特捐廉三百金以爲倡始邑紳商張君恒軒白君守先任君美玉王君毅菴李君春聲王君鶴坪安君鏡齋輩咸慷慨樂助以襄斯役遂囑戴君省齋李君春聲高君雲渠用價銀三百兩置得本鎮馬姓房屋十五楹復爲諏吉興工經始於庚子二月越兩月告成而規模已大具焉余竊思公

署爲官府治事之所於體制必不可無創建之難倍於修葺其經營措置助其事者贊之任其事者主之將以使後之蒞斯土者曉然於此舉之始自何人創自何日則不可無一言以誌之而非敢以創始居功也是爲記

重修北塘文昌宮碑記

翟文臺 邑人

北塘故有文昌宮其宮在正街三官廟大殿西偏東向三楹基址狹隘雖屢加修葺而舊貫仍焉厥後殿宇漸頽薦紳先生皆欲崇其氣象擴其規模因於大殿後度隙地而經營之鳩工庀材克勤無怠盛舉也畫棟雕樑丹堊相錯美觀也改其制而不改其意凡有鑒於前型者皆承先啟後之深心也是宮之作經始於三月落成於七月

甯河縣志

卷之十三

紀載

奎

北塘南牆記

前人

北塘莊南自咸豐八年春添築土牆長三里許兩濠環繞置鎗礮旗幟防土寇也勸捐鳩工兩月始成總其事者陳公鴻壽張公文誥李公廷模也其兩濠之間有橋焉戊午秋重修翟公賡和監修貧不受餽亦

善士也是歲也督憲譚在東沽與夷人戰兵敗散土寇紛起直逼村南時陳公鴻勳張公文誥辦團與眾紳之在練局者率勇登牆施放鎗礮土寇逃避一鄉以安同治八年因亂牆又增高添置器械列礮洞二十座鎗洞七十座亦陳公鴻勳張公文誥李公廷模及張公文田總其事李公芬倡捐而事以集邑侯呂公賜倡義保安匾額以旌之同治十年大水村南民舍亦賴以完固焉

鐵泉記

高天秩 邑人

甯河縣志

卷之十三

紀載

三

聚糧城者唐季劉仁恭屯糧之所也自數百年來迄國朝仁風翔洽共享太平村民胥以鬻薪播穀爲業已已歲村人有苗姓者一日遊於野至一高阜俯而視之似有鐵形以手撥之果是乃招村人羣以鑿鑿掘之得巨鐵長丈餘寬三四尺厚二尺許沉重無極人雖盡力推挪莫能動不得已而碎之共分其所獲旣而水聲潄潄自穴中出村人挹而飲之甚甘因造以爲井焉庚午夏余經行其地爰求村人引而觀之但見細水泠泠平鋪如鑑村人復出其鐵憑眺之際不

覺駭然因意此處或屬泉眼昔人恐水之汨湧有防  
百姓乃覆巨鐵於其上蓋止之使不得出也至今不  
知幾何年月縱屬泉眼亦安能復作汨湧爲乎余流  
覽之餘因以爲記卽以鐵泉名篇

濠牆記

苗夢蘭 邑人

環蘆皆水也北襟薊運南帶海濱以是帆檣雲集人  
物豐饒甲諸他里庚申歲英夷犯順僧邸按臨所屬  
邑侯奉王命率邑人築牆浚濠爲捍禦計南至溝渠  
外里許施鍬鍤焉形若半月蓋首尾皆迤其當孔道

甯河縣志

卷之十三

紀載

畜

處上作巨橋通之斯地也舊多園圃而恒艱於水自  
茲濠出園圃之擴者幾倍里人之仰其利者數十百  
家有事而險可憑無事而田可漑河之功烈矣閒嘗  
攜二三友人登眺見夫天桃垂柳遠樹平蕪水色天  
光斜陽殘雪西則魁樓高拱東則文閣遙臨其間比  
屋鱗次帆檣上下俯仰左右顧而樂之友曰憶庚申  
歲初築此牆其時羽書旁午烽火連宵鄉之人思所  
以守衛者日傳宣於道路以今視昔易危爲安環堵  
欣成樂土斯亦足以備遊覽而成大觀矣乎余聞斯



言重有感焉蓋蘆臺二百餘年休養生息耳不聞鉦鼓之聲目不覩旌旗之色四民樂業含哺鼓腹忘帝力於何有自咸豐以來三逢兵警而此地晏如因思農服先疇士食舊德誰爲爲之非我

朝德洋恩普烏足以致此哉吾人生逢

盛世而得優游於光天化日之下者不可謂非幸也友曰善是不可不記其端委焉是爲序

新建西堤頭雙通盛橋碑記

運判

王鍾霖

山東人

天津東四十里接甯河界有村曰西堤頭村西有大

甯河縣志

卷之十三

紀載

奎

木橋中有小石橋捐建不記年皆通舟車西自天津

三义河東接甯河蘆臺洵河長百數十里日隨潮會

七里海間旋隨潮落弗能浮大舟往往非潮舟莫送

舊名小河西北又受永定河下游塌河淀亦曰淀河

夏秋水至環堤頭遠近爲澤國行旅幸有舟可通冬

春木淺且凍弗由此橋近無他途爲京東之孔道同

治二年春余補薊永分司缺時由蘆臺赴天津舟過

橋下仰窺見大車軋橋木互相軒輊每遇車翻於河

牲畜折足橫橋間咸視爲畏途奚可不治村人言境

爲九河下梢歲恆不登以魚鱗草子爲活奚力之能治且非易木爲石卽治亦易壞奚力之能易陷者可憫拯過多忘弗見者漠然也余念徒枉輿梁爲政之急乃商旅病而貧黎嗟奚可以不治自顧職不任地方入俸又薄無以治此橋聞村人李維訓李芳等嘗有志於斯因呼而勗以善動以義捐資以倡爲文以述令勸四方人期大助厥工棄木更石取材於盤山一水可運村民欣然依而行五年集有資六年旱且潦七年有匪警八年工興而資弗繼村人聒余若余

甯河縣志

卷之十三

紀載

矣

事余愧無以對弗暇避嫌爲之尋捐士復言於津宰許募及舟車九年春石橋成齒石密以立唇石厚以堅腹石複以坦復輔兩端俾寬以固車過若砥舟過若洞駝者擔者推者步者每息於橋或維舟橋邊皆不知有昔日患余亦過橋而喜將以嘉村民而民俟於橋咸頌不置余赧然曰出資旣微又無手足之勞微衆力橋奚成且奚成以石民曰吾儕先世來未聞有勸治此橋如分使者向亦欲訴諸官懼斥爲好事將以橋爲利否則是究是亟民且因橋擾不然夫豈

不知橋之久患哉今分使愛人而好善四方知分使者素讀勸修橋文無不感激而樂輸不然夫豈易成哉橋無名請分使名並賈力以起小石橋使相同余喜斯人多義尤喜李維訓等之不辭勞怨而雙石橋竟成也爲記書碑以彰之橋爲通州天津達盛京之要路因皆名通盛橋其村衆及捐資姓氏皆詳誌於碑

北塘大營礮臺記

王鍾霖 見前

營之設也設於北塘村之東首蓋自道光二十年海

甯河縣志

卷之十三

紀載

七

氛不靖奉

旨提調大名正定兩府官兵駐防北塘河口遂立營焉河之南爲南營河之北爲北營又南爲小南營設兵鑄礮所以禦賊寇壯

國威也先是北塘舊有雙壘自

國朝雍正九年甯邑與寶坻分疆而北塘一隅遂隸於甯遠乾隆四十四年修甯河志都人士將雙壘採入八景鳩工繪圖列於志之篇首此礮臺所由起也厥後基址雖存規模久缺當海潮澎湃之時其舊跡若

無若有茲於設營伊始仍其基址廣其規模擇吉興工構材運甕復築新礮臺凡大小三座其他若營垣若營門若營房修造悉備且垣之外有濠焉門之外有橋焉房之外有教場焉藏火藥有局藏器械有庫其中旌旗對列劍戟齊排鐵礮銅銃環設臺首東向直衝海口南接沽營北連蘆鎮西護北塘一帶村戶是營壘之設勢振

天朝威揚外域洵可謂表海之雄風也豈非甯邑一大觀哉咸豐九年加修同治十年又復增修築營房分左

甯河縣志

卷之十三

紀載

奕

右練軍千餘駐其中總鎮吳公殿元唐公仁廉先後督工籌畫周密堅固輝煌彌壯觀瞻矣因原其始末以爲之記

重修塞上鹽母三官廟碑記

鹽場大使

金承詔

桐城人

蘆臺地濱海厥產惟鹽粵稽五代時鹽絕歲餘忽有老姥教人爲鹽之法隨即化去人皆神之因建祠曰鹽母廟蓋報本反始也其在鎮之西者載於志乘當事者歲時享祀疊加修理迄今完固若夫在塞上者緣嘉慶戊辰年村人李斗賓等舉義捐資創建於三

官廟之左爲時旣久傾圮頻仍適余承乏斯土每因公務往來憩息於茲瞻仰徬徨則見棟折椽崩風雨侵蝕斷垣破牖觸目驚心隨復周視於外實以地居窪下潮溼浸漬致柱木易就腐爛亟思所以新之計功程需費甚鉅余試捐廉首倡幸莊中紳民翕然慷慨助捐又兼四方樂善君子亦爭先施舍所以樂輸姓名俱於事成刻石其經之營之也先引土增高基址乃規仿舊制次第興築左則鹽母廟也右則三官廟也後則觀音殿也而前之抱厦後之配房以及後

甯河縣志

卷之十三

紀載

堯

殿之右有齋房左有禪室皆昔所本無廟之南舊有一小蹊直遞南村其中間有埠所以濟津河也今已廢無遺跡亦併修起以便往來因命曰太平橋噫是役也雖曰重修實不啻創始矣又賴老成持重者數人不憚勤勞爲之鳩工庀材人力均齊用能不數月而功竣琳宮整潔法象莊嚴自茲以往神之嘉惠斯民者詎有艾歟至隨時修葺俾永臻於勿壞則有厚望於後之同心好善者是爲記

重修東嶽大帝行宮記

乾隆庚戌

夫廟以人而重新而人亦嘗因廟以不朽東嶽大帝  
行宮創自前明以之棲神亦爲西關之鎮歷年旣久  
風雨摧殘烏鼠穿啄遲之又久蓋瓦級磚盡皆頽壞  
甚至廟徒壁立像竟塵封入廟生敬之謂何矣劉公  
紹祖者甯邑善士也嘗往來其地觸於目而警於心  
於是出已囊以開先請之邑令謀及紳士謀及邑人  
曰吾已創之於始凡有不足者吾必成之於終而邑  
人敬公之爲人樂公之行事又見公之佈置周全無  
不竭力捐資贊襄其事今年春月鳩工庀材成功在

指日之間而公適病至五月病篤時戒其子姪曰此  
廟之修爲吾數十年夙願幸得諸君子助理吾死後  
爾等各出乃力勿使事敗垂成其子姪泣受命至於  
今廟則成矣公雖歿亦如未歿矣凡殿宇巍峩非向  
之將成邱土者乎墻垣整飭非向之烏獸棲息者乎  
東西配房非向之藜棘叢生者乎然則非公之慷慨  
樂施而能煥然一新若是乎於是撮其大畧以誌之  
俾後之覽者得卽廟以思人愈因人而興起云耳

東嶽大帝行宮始建不知何年至於重修之舉則乾隆庚戌太學生劉公繩武之所創也其重修之始末前之人已額而誌之劉公固與斯廟永垂不朽矣由庚戌至今八十餘年風雨摧殘鳥鼠穿啄門牆破敗殿宇傾頽較前爲又甚焉邑紳劉公長瀚誠篤人也於同治甲子倡修西關之藥王廟工旣竣遂起重修東嶽行宮之意邀諸同志設法捐資至同治庚午庀材鳩工興修未半一病不起亦若前之劉公功未成而身先殞也其時修廟之功幾於中止幸有李文臺

王毓秀馮雨亭王裕安諸公皆老成練達謂此舉不可廢於半途竭力贊襄並劉公之兄諱長祿者痛其弟之亡而傷其志之未遂也於是繼而成之至壬申秋功將竣首事諸公念其事始於劉公而公不終其事又與劉公繩武相若亦欲如前人之記劉公繩武者記之而屬於余余於長瀚族叔姪也年相比投無不合茲之記殆有實難辭者嗚呼今之殿宇又復巍峩矣牆垣又復整飭矣東西配房又復煥然一新矣公雖亡不亡矣然非諸公之竭力贊襄不幾功敗於

垂成乎噫此功之成其神靈默佑乎抑誠心所感格乎是未可知也謹記之用垂不朽云

重修西關藥王廟碑文

貢生 劉長瀚 邑人

是廟也不知創始於何年重修於何代並不知山主爲何人蓋自古以來實與一鄉一邑並垂不朽也聞國初修整者有杜文端公厥後修葺者有張德遠張浚功廉柏菴諸公然亦得之傳聞碑無紀載後之有志重修者往往難之近聞道光初年有僧越凡者住持是廟清貞嚴肅募化捐資廟宇器具煥然一新香

火園地共計四十餘畝護廟樹木三五十株鄉里往來者莫不嘖嘖稱善固一時盛事也惜其徒不守清規多還俗去風流雲散廟宇一空二三十年並無歲修之一舉且園地日荒器具日失樹株日缺因之雨剝風摧殿堂傾圮廟貌敗壞至此不可問矣迨同治七年始招住持道公議重修爰立緣啟佈告四方冀集腋以成裘庶衆擎之易舉凡城內諸君子外莊各善士莫不踴躍捐輸樂襄其成自二年二月動工十月工竣不期年而錢滙萬餘千焉嗚呼是誠神有靈



通而人皆輻輳也至三年二月七日演古酬神設宴  
謝客又以餘資挑道立牆諸臻美備非倡始者矢以  
真誠贊成者出以正直烏能始終如一絲毫不苟如  
此哉後之有志重修者秉至誠而無偽庶克副前人  
龜勉從事者大公無私之心焉耳

續修蘆臺通河跳板記

生員 廉保田 邑人

古者十一月徒杠成十二月輿梁成爲民不病涉也  
大其觀於乘輿之外廣其利於車馬之間王政一時  
洵足千古焉若詩稱造舟爲梁亦以河之寬者不能

甯河縣志

卷之十三

紀載

三

爲橋因以梁濟之獨北方天寒地凍水卽爲冰卽梁  
又有時窮矣甯邑蘆臺河爲薊之運河地屬通津往  
來者日千萬計舊有官船渡之至冬季水凍率由冰  
上行河長冰滑顛仆之苦傾塌之憂行人苦焉光緒  
丙子冬北塘例貢生五品銜李公毓東者目擊而心  
惻然因思通河跳板邑侯謝公洪恩曾有舊製今雖  
腐爛法則猶存前人創之而後人敗之可乎哉於是  
親董其事購巨材興木工自南岸至北岸周而量之  
準河之短長破而爲跳板斷處以鐵環釘之復以麻

綵聯之畫則引以扶手夜則照以明燈數十丈駕橫  
河面馬驟車馳雖衢路康莊不是過也共費東錢兩  
仟餘串俱出自己囊且欲隨時繕補毀折者易之朽  
蠹者新之俾有基而勿壞非亦利物濟人之務哉是  
宜記之以勸善

翟際華寒竽小草詩序

廩生

杜昌言

靜海縣人

翟子名際華號梅埜鹿樵其別號也爲甯河名下士  
生平善病癸亥春咯血舊疾復作爰偕友人養症於  
古蘄之田盤山借榻天成寺中僧笏十笏嗒然一入

甯河縣志

卷之十三

紀載

書

定人也殫殍至浴佛日之次夕禪扉夜掩風如啼燈  
如泣上下院之簷廊鈴舌驀地作咄咄怛化聲而鹿  
樵溘逝先是鹿樵之邁斯疾也在酉年僑寓都中三  
元菴內始病病於初地死死於化城佛有靈耶佛無  
靈耶哀憫示現顧若是耶其人之性情天真爛熳豪  
飲酣歌居恒衫履不自由不屑屑於鮮車怒馬以爲  
造物者惜福其學問書法酷嗜李北海詩以香山義  
山爲宗時步趨於漁洋長短句摹竹垞太史陳其年  
袁子才兩名公乃其四六準繩抱如許之才華絕不

以傲睨同人儂薄不居何鬼伯之相催促耶余思其故亦鹿樵自爲之也夫薪者之於駭鹿也俄疑其爲夢而失之旋案所夢而得之復訟厥夢而分之此鹿樵所以常常爲夢中之鹿樵此鹿樵所以不常常爲夢中之鹿樵也而又何悲乎

翟際華寒筍小草詩跋

廩生

杜

駿

靜海縣人

十載論交寸心耿耿一朝辭世分手怱怱俄桂蝕而松崩抑芝焚而蕙歎化鶴人歸他日丁威柱上離鸞仙去昨宵子晉笙中緬想風流頻揮雨泣憶夫羅雀

蒲河縣志

卷之十三

紀載

畫

高門雕龍才子學如老宿名匪青年擅嘔肝落唾之詞華翩瘦爪通眉之態度功名握券庠舍擧旗不圖五色賦迷康了毡圍兩號莫說三元庵樂爭禁刷勒連科心由耗耗而椎血自咽喉以灑拭杜鵑之冷淚舌染深更飄蝴蝶之芳魂夢蘧化境遙盼天成寺內何殊示疾維摩應皈地藏王前從此超身切利盤山若劍割斷離腸薊水如環旋來遺蛻心朋之涕眼絕少晴時肉戚之愴神茫無歡處想香醪叨飲酒痕襟上仍留愛麗句工吟詩卷囊中尙在訂寒筍之小草

草歇池塘購古錦之名花花憐子母所有遠近哀輓  
詩詞附刊卷後良堪寫怨鵲鵲關口之吟聊以抒情  
蝌蚪巖前之響篇篇泣鬼誰從閉墓酬章語語驚人  
我欲臨風膜拜

### 書鄉文社記

書鄉文社設於邑南九十里之北塘乃光緒元年建  
也緣是鄉自乾嘉以來沐

聖朝雅化譽髦鼓勵思切觀摩而距渠梁特遠赴課歲無  
一人雖當同治戊辰己巳歲呂公嘉端彭公瑞麒兩

### 甯河縣志

### 卷之十三

紀載

美

邑侯稟請以賑捐餘貲接濟書院經費而北塘有志  
之士每因兩河間阻以往返二百里爲艱時相嗟嘆  
焉有陳公學會仰承先志與同人商議撥船商公款  
三百金以充經費取周官鄉大夫書賢能義創立文  
社以助書院教之所不及非敢云歧而二之耳每月  
生童兩課延師以定甲乙制藝則一文一詩供給則  
一茶一飯膏火獎賞各有等差且寒士自應試迄成  
名時給資斧多所成就由此邑南文風日上則以文  
社贊成書院之爲也

論曰陸士衡論文分爲十體于詩賦碑誄銘箴頌論  
奏說等各以四字括之而餘紀載之文闕如楊用修  
欲補以序原始而要終記制器而尙象二語論者臆  
之矧一邑創造所繫都人士著作所存不有所紀其  
何以傳哉至于文章體製本同末異期于廣恕通方  
未必人盡韓柳也因稍拾而存之雖篇什近寡要不  
可任其廢墜云